

AGHAM-BAYAN

AGHAM AT TEKNOLOHIYA PARA SA MASA

Iathalain ng Liga ng Agham Para sa Bayan

Tanging Labas

Abril 1978

DEMOKRATIKONG REBOLUSYONG BAYAN ANG WAWASAK SA DIKTADURANG ESTADOS UNIDOS-MARCOS

Ang diktador na si Marcos at ang kanyang among imperyalistang Amerikano ang pinakamagagaling na "tagapagturo" ng bayan. Sa pamamagitan ng kabaligtarang halimbawa, napapakikita nila sa bayan kung anong landas ang dapat taha-kin tungo sa kalayaan, demokrasya at kasaganaan.

Sa nakaraang "halalan" para sa Interim Batasang Pambansa o IBP, lalong luminaw na hindi sila ang mag-aahon sa bayan mula sa kahirapan, sapagkat sila ang nagpapasidhi nito. Hindi kusang bibitawan ang kapangyarihan, bagkus gagamit ng sukdulang panlililang, pananakot at dahas para pahigpitin pa ang sakmal dito.

Walang ibang daan tungo sa pambansang kalayaan at tunay na demokrasya kundi ang magkaisa ang taumbayan, ibagsak ang diktadurang EU-Marcos, at waksan ang buktot na paghahari nila sa bayan.

Hungkag ang IBP at "Halalan"

Nilikha ng diktadurang EU-Marcos ang IBP para lalong patatagin ang pasistang paghahari sa pamamagitan ng batas militar, hindi para buwagin ito. Kasangkapan ng diktadura ang IBP para linlangin ang taumbayan at ang buong mundo. Kunwa'y bibitiwan na ni Marcos ang sinolo niyang kapangyarihang gumawa ng batas. Kunwa'y ipinaubaya na ito sa isang lehislaturang halal ng taumbayan.

Ang totoo pinilit ng imperyalistang Amerikano si Marcos na magdaos ng "halalan" para sa IBP dahil gusto nitong tiyakin na ligtas ang kanilang puhunan at kalakal sa Pilipinas kahit mawala si Marcos. Samantalang maibabandila nito ang sarili bilang tagapagligtas ng demokrasya at "kampeon ng karapatang-tao (human rights)".

Sa bahagi ni Marcos, siniguro niyang hindi magiging kaagaw sa kapangyarihan ang IBP. Habang hawak ang karapatang ipawalang-bisa ang anumang batas na gagawin ng IBP, maaari niyang buwagin ito kailanmang gustuhin niya, lalo na kung sumasagka ito sa kanyang interes. Pero malayo nang mangyari ito, yamang minaniobra na ni Marcos na maging sunud-sunuran ang IBP sa lahat ng pakana niya at ng amo niyang imperyalistang Amerikano sa pandarambong sa kayamanan ng bansa.

Tingnan na lamang ang garapal na paglulutong-Macoy ng "halalan." Sa mga alituntunin sa kampanya at "halalan pa lamang llamado kaagad

ang mga kandidato ng pasistang rehimen. At para siguradong hindi makalusot ang isa man lang na oposisyonista, sukdulang pananakot, panunuhol, pagsisinungaling, pambibili ng boto at pandaraya ang ginawa nila. Sinagad ni Marcos ang paggamit sa lahat ng katiwalian ng nalalaman niya para tambakan ang IBP ng kanyang mga alipuris at sikilín ang pasiya ng taumbayan.

Takot ang Diktadura sa Bayan.

Ipinakikita nito kung gaano kalaki ang takot ng diktadurang EU-Marcos sa sambayanan, at kung gaano katindi ang pagkamuhi niya sa taumbayan. Palibhasa'y nayayanig ng malalakas at maririing hambalos ng lumalawak na kilusang antipasista, anti-imperyalista at anti-piyudal sa buong kapuluan. Palibhasa'y nabubulgar ang kabulukan at lahat ng katiwalian sa pasistang rehimen nito hindi lamang sa bayan kundi pati sa ibayong dagat. Kaya't kailangan ng panibagong panlilinlang-- ang kunwa'y pagbabalik sa "normalidad", pagbabalik sa mga "demokratikong pamamaraan".

Napakalaki ng takot ng diktadurang EU-Marcos sa taumbayan, at napakaliit ng tiwala nito sa sariling kakayahang lutasin ang mga suliranin ng bayan. Papaano'y talos nitong kahit isang oposisyonista lang sa loob ng 200-kitaong IBP ay sapat para makapagbunyag ng mga katiwalian ng pasistang rehimen. At talos nitong imposibleng manalo ang mga kilalang tuta nito sa partidong KBL kung hindi gagamitan ng sagadsarang pandaraya at pananakot.

Pero malililinlang pa ba ng diktadurang EU-Marcos ang taumbayan? Hindi. Ipinamalas ng taumbayan nuong panahon ng kampanya at "halalan" na hindi umuobra ang mahigit na limang taong panlilinlang ng pasistang diktadura. Hindi sila nabulag ng mga nakasisilaw na palabas at mararangyang sirko. Hindi nabaluktot ang kanilang isip ng mga kasinungalingan at panlilinlang. At hindi sila nasindak, manapa'y naging mas maingat lang, sa harap ng pananakot at karahasan ng pasistang rehimen.

Sigaw ng Bayan: Lumaban!

Sa buong kapuluan, sinamantala ng taumbayan ang pagkakataong ilantad ang kabulukan ng "Bagong Lipunan" ni Marcos. Inihayag nila ang pagtutol sa kabuhungan ng pasistang diktadura at sa pagkatuta to sa mga imperyalistang dayuhan. Sa araw ng halalan, ipinakita ng taumbayan na hindi sila kayang lokohin ni Marcos sa ipinangangalar dakan niyang "normalisasyon". Sa halip ipinamalas nila ang pagkararapatan sa diktadura sa pamamagitan ng pagtakwil sa mga piling kandidato. Kung saan may oposisyon, ito ang malugod na tinangkilik ng mga mamamayan; kung saan walang oposisyon, binoykoteo ang huwad na "halalan".

Sa Kamaynilaan, noong gabi ng Abril 6 --bisperas ng "halalan"-- buong lakas na inihiyaw ng taumbayan ang matindi nilang galit sa diktadurang EU-Marcos. Lumabas ang milyong mamamayan sa kanilang mga tahanan, lumikha ng pinakamalakas na pag-iingay na makakaya nila, buong giting na isinigaw ang kanilang kahandaang labanan ang diktadura para makamit ang tunay na kalayaan, demokrasya at kasaganaan.

Sa harap nito'y lalong naliligalig ang diktadurang EU-Marcos. Natutuliro siya sa paghahanap ng iba pang paraan ng panlilinlang at pananakot. Sapagkat nakikita niyang wala nang bisa ang kanyang mga pakana sa "Bagong Lipunan". Nakikita niyang habang dumarami ang mumulat sa katotohanan at nangangahas makibaka, higit na karahasan ang kailangan niyang gamitin at kailangan niyang pagtakpan.

Desperado ang diktadura kaya't kahit mabaho na't pangit ang maskara, isusuot rin ito para takpan ang mas mabaho at mas pangit

niyang mukha. Tiyak, kahit lantad na ang IBP bilang mapanlinlang na pakana ng diktadura, gagamitin pa rin ito. Sapagkat ito na lang ang nalalabing paraan para panatilihin ang sarili sa trono at pagtakpan ang higit pang kabuktutang gagawin para supilin ang dumaragsang pambansang demokratikong kilusan sa buong kapuluan.

Subalit alam na natin kung papaano gagapiin ang asong ulol na tulad ng diktadurang EU-Marcos. Alam na nating kailangang magkaisa, Sukulin ang diktadura. Ilantad ito mula sa pinagkukublihang mga basurahan tulad ng IBP, Iwasan ang nauulol niyang pananalakay hanggang siya'y mapag od. At buong lakas na hambalusin siya sa lahat ng pagkakataong mayroon tayo.

Magkaisa para Ibagsak ang Diktadura

Nakikiisa kaming mga kasapi ng Liga ng Agham Para sa Bayan (LAB) sa lahat ng mamamayang nakikibaka para waksan ang kanilang pagdurusa't pagkaapi sa ilalim ng pasistang diktadura. At nananawagan kami sa lahat ng mamamayan, lalo na sa kapuwa naming mga siyentipiko at teknolohiko--- mga teknisyen, makinista, inhinyero, doktor, nars, siyentipikong guro't mananaliksik, estudyante -- magkaisa tayo para sa iisang layuning ibagsak ang diktadurang EU-Marcos upang makamtan ang pambansang kalayaan at tunay na demokrasya.

Ilantad natin at tutulan ang lahat ng kasinungalingan at paglinlang ng pasistang diktadura. Ibunyag natin ang mga pakana nitong pandarambong at pangungurakot sa kayamanan ng bayan. Tayong mga siyentipiko at teknolohiko ang nasa pinakamainam na pusisyon para makita at ilantad kung papaano ginagamit ng diktadura ang agham at teknolohiya para sa sariling pakinabang at hindi sa kapakanan ng bayan tulad ng ipinangangalandakan niya.

Halimbawa ang malaking anomalya sa pagtatayo ng plantang nuklear sa Bataan, kung saan milyun-milyong dolyar ang tinubong kickback ni Marcos at ng kanyang mga kamag-anak para itayo ang isang plantang makapagdudulot ng lubhang panganib sa bayan. O kaya'y ang pagpapabaya sa mga ospital para sa masa tulad ng PGH at QI, samantalang itinatayo at ginagastusan ang mga ospital tulad ng Heart Center na pinakinabangan ng iilan lamang. O ang mga pakana ng Technology Resource Center kung saan ang mga maralitang tagalunsod ay ipinagtatabuyan sa ngalan ng "development" at sa ilalim ng mapanlinlang na bandilang "teknolohiya para sa masa". O ang paggamit ng agrikultura para manatili tayong alipin ng industriya ng imperyalistang Amerikano. Marami pang ibang halimbawa kung papaanong tayo mismo ay kinakasangkapan at nilililang ng diktadurang EU-Marcos para patatagin ang paghahari niya. Ilantad natin at tutulan ang lahat ng ito!

Lumahok sa Demokratikong Rebolusyon

Lumahok tayo't tumulong sa pambansang demokratikong rebolusyon. Malaki ang maiambag natin sa paglutas ng mga suliranin ng rebolusyon na may kinalaman sa agham at teknolohiya. Magagamit natin ang ating kaalaman at kasanayan laban sa diktadurang EU-Marcos.

Makakatulong tayo sa pagdisenyo, paggamit at pagkumpuni ng iba ibang kagamitang kailangan ng mga rebolusyonaryong puwersa sa buong kapuluan, tulad ng mga armas, radyong pangkomunikasyon, kagamitang medikal, atbp. Ang mga may kaalaman sa kalusugan, lalo na ang mga doktor at narses, ay makatutulong sa panggagamot ng mga kasama sa pakikibaka at masang maysakit o sugatan; o makapagbibigay sila ng gamot na kailangang-kailangan ng mga kasama at masa lalo na sa kanayunan. Bukod dito, magagamit natin ang lahat ng mga pasilidad na nababot natin tulad ng mga talyer at mga laboratoryo. Mapagkukunan din ang mga ito ng mga kagamitang at materyales na kailangan natin

at ng mga kasama at masa.

Mahalagang papel ang ginagampanan natin sa pagpapalaganap ng isang kulturang siyentipiko, at may pambansa't pangmasang katangian, isang kuluturang tumutugon sa mga pangangailangan ng bayan. Mismo sa paglalantad ng mga kasinungalingan at panlilinlang ng diktadura nawasak natin ang kulturang ipinapalaganap ng pasistang rehimen. At mismong sa paggamit ng agham at teknilohiya para sa masa nakatutulong tayo sa pagbubuo ng kulturang tunay na naglilingkod sa sambayanan at hindi sa iilan lamang o sa mga dayuhan. Bukod dito, malaki ang maitutulong natin sa pagpawi ng piyudal na kulturang batbat ng superstisyon. Gayundin sa pagpawi ng burges na kultura kung saan laganap ang eskapismo. Papaano? Sa pamamagitan ng pagpapalaganap ng maka-siyentipikong pamamaraan ng pagsusuri at pananaw sa daigdig.

Determinado ang diktadurang EU-Marcos na gamtin ang buong kapangyarihan nito para panatilihin ang kanyang paghahari at supilin ang mga karapata't adhikain ng sambayanan. Sa harap nito kailangan nating pahigpitin ang ating pagkakaisa. Malugod na tinatanggap ng Liga ng Agham para sa Bayan ang lahat ng siyentipiko at teknolohikong handang lumahok at tumulong sa pambansang demokratikong rebolusyon. Gayundin, handang makipagtulungan ang LAB sa lahat ng puwersang nakikibaka para ibagsak ang diktadura at maitayo ang isang lipunang tunay na malaya at demokratiko.

Naniniwala kaming sa pamamagitan lamang ng pagkakaisa ng milyunmilyong mamamayan sa buong kapuluan natin magagawang paligiran at sukulin ang diktadura at ang mga kompon nito. Sa pamamagitan lamang ng pagkakaisa natin mabubuo ang sapat na lakas na wawasak sa makinangyang umapi at nagsasamantala sa bayan. Sa harap ng nagkakaisang lakas ng bayan, tiyak na magagapi ang diktadurang EU-Marcos!

* * *